

N O R T G O I A,

vel

BAVARIÆ PALATINATVS.

BAVARIÆ altera pars, quæ vltra Danubium Bohemicam excurrit syluam, vocatur nostro æuo (sicut & olim) Nortgoia, habens Nurenbergam Metropolim; vnde Regioni, secundum quosdam, datum nomen. Et licet Nurenberga non sit peruetusta Ciuitas, tamen Castrum eius in ædito colle situm, quod olim Castrum Noricum fuit appellatum, est antiquum. Habet hæc Regio plurima Oppida, Monasteria, & Villas, potiss. Amberg; Sultzpach; (Castel Monasterium; vbi olim Principes Nortgoiæ suam habuerunt Curiam.) Eger; Beierut; Eistet; Napurg, &c. Quæ pro maiori parte sunt Principum Palatinorū. Siquidem Ludouicus Imp. & Dux Bauariæ fecit Anno Christi. 1339. huiusmodi diuisionem, quod ex tota Bauariæ Prouincia Palatinis Principibus cederet Nortgoiæ Regio, præter Oppida quædam Imperialia: Multa etiam pertinentia ad Coronam Imperij, olim fuerunt Principib. Bauariæ impignorata. In hac Regione inter Bambergā & Nurenbergam, ad Orientem, versus Oppidum Eger, situs est mons magnus dictus Fichtelberg, ex quo profluunt quatuor insignes amnes, Mœnus, Nabus, Sala, & Eger. Complectitur autem mons iste in circuitu suo circiter sex miliaria, & extrudit varias metalli species; gignit & optimum cæruleum colorem, quem vulgò Lazurum vocant. Inuenitur quoque in summitate montis stannū, & multæ foueæ, ex quibus olim metalla fuerunt eruta: in summa, tota illa Regio turget mineris, potiss. ferri, vnde Nortgoienses annuatim magnam vim pecunię colligunt. Hactenus Seb. Munsterus. Vide etiam Pium. II. De origine Palatinatus huius Regionis, lege Franc. Irenicum. Huius Regionis Urbem primariam Nurenbergā, elegantissimè descripsit Conradus Celtes Poëta. Montem Piniferum, quem Fichtelberg vocant, descripsit Gaspar Bruschi Egranus peculiari libello.

V V I R T E N B E R G E N S I S

D V C A T V S.

REGIO Wirtenbergensis Ducatus circulem habet quasi situm; complectiturque Ciuitates & Oppida plurima; multa Castra, & Monasteria; Villas, & Vicos penè infinitos; præter tres Ciuitates Imperiales, Esslingam, Wilam, & Reutlingam, quæ intra ditionem Principis suum habent situm, & proprias Iurisdictiones. Præstantiores autem huius Ducatus Ciuitates sunt, Tübinga, vbi Academia; & Stutgardia, vbi Principis sedes. Hæc præfatus Munsterus, & plura. Huius Regionis primarium fluuium Neccarum, & ceteros, pulchrè describit Fr. Irenicus lib. 8. cap. 34. Neccarus fluuius, generosi vini, quod inde Neccarense vocant, fertilis est.